

皇

明

書

皇明書卷之四十三

新城草野臣鄧元錫錄

心學述

昔太史公論七十子之徒譽者或過其實毀者或損其真余讀而悲之彼其人皆親炙聖人於三千中稱速肖至誅眇矣迨漢世論定猶然不免於損真之毀况當時乎禮曰天地之大也人猶有所憾則夫人懷剛柔好惡以有生意識雜操氣忤欲脅欲自免於毀宜其難矣自世下衰學者不復知務學修道爲何物近先覺覺之世始復有師友問學之

事豈無借資寧靡圯族然存十一於千百循省服  
踐則亦豈非難哉今因噎而廢食將墜緒削迹而  
大業終無從覩矣有物於此一人指之不如衆人  
指之易見也一人爲之不若衆人爲之易成也析  
馬之百體不謂之馬立百體而謂之馬嗚呼其善  
喻也夫其善喻也夫 始王文成自龍場歸餘姚  
徐曰仁愛山陰蔡希顏宗交朱守忠節實首從受  
學是歲同得舉文成公有別三子序已並舉進士  
曰仁文成公妹婿也旣聞學奮然志於聖修知和  
州有惻怛之政考滿陞南工部員外郎而文成遷

南太僕卿遂同舟而南舟中反躬默詣聞大學宗旨踴躍痛快以爲先生之教實孔門嫡傳舍是皆傍蹊曲徑斷港絕河也蓋是時先生以全與曰仁以全受故一信不回後文成與學子語入微輒曰此意惟與曰仁舟中及之復同官南而同志益親及文成撫南贛曰仁亦請告歸與陸澄謀耕雪上之田俟師歸爲同志久聚計以誠身淑後未幾卒文成哭之慟祭之文甚哀先是曰仁遊南岳夢瞿曇撫其背曰女與顏子同德旣而曰亦與顏子同壽已而果然曰仁及門獨先聞道最早和粹謙冲

雖無意親人而人自親之同門皆自以爲不及云  
節學識其大又好善不倦接引同志趣之使同歸  
於善官御史視天下之務不啻其家事毅然欲以  
身任之文成謂之曰德業之外無事功不由天德  
而求騁於事功則希高務外非業也後按山東直  
流賊作竟以驅逐過勞而卒宗交謙厚和平居恒  
以顏子爲師事賢友仁追琢其德而介然有所不  
爲官教授爲當道忌嫉輒棄去文成以爲歸計良  
是而稍傷急迫再過二三月托疾行則形迹泯然  
旣不激怒於人亦不失已之介矣聖賢處末世待

人應物有時而委曲道固未嘗不直也若已爲君子而使人爲小人亦非仁人忠恕惻怛之心後起官興化復興當道經文成以書戒之曰有人於此待我以枉違必自反於仁自反於禮又自反於忠希淵省克精切其肯遂自反爲忠乎區區往謫龍場橫逆之加日至迄今思之正動心忍性砥礪切磋之地其時乃止搪塞排遣竟成空過惜也後教南康徙太學助教遷按察僉事督四川學方文成詣龍場時常德義元亨辰陽蔣信劉觀時從問學比東歸俱有立文成喜謂之曰絕學之餘求道者

少一齊衆楚最易挫奪自非豪傑鮮有卓然不變者諸友宜相砥礪夾持務期有成近世學者實德未成而先揭標榜來世俗之謗徃徃以曠墜無立諸友宜以爲鑒刊落聲華務於切已處着實用力也君子之道闇然而日章爲名與爲利雖清濁不同然其利心則一謙受益不求同於人而求同於理此數語宜書之壁間常目在之也舉業不患妨功惟患奪志如前日所約循循爲之亦自兩無妨礙所謂知得點點掃應對便是精義入神也其後惟乾旣死忠泰之難信後從甘泉公游官職所至以

明道淑人爲務世稱道林先生其學以萬物一體爲宗其言曰大學始教必先格物致知物也者通身與家國天下而言之也知身家國天下渾是一物則知此心此理與物無對將此身與天下萬物這爲一物何物痛癢非我痛癢旣見得卽如此措工便處處脚着實地五倫萬事此心無所不貫也羅修撰洪先讀其書以爲良工苦心云觀時問未發之中文成曰但戒謹不覩恐懼不聞養得此心純是天理自見之矣觀時請略示氣象曰啞子喫苦瓜道不得也欲知此苦湏汝自喫曰仁侍側太



息曰如此方是真知便是行坐中皆有省冀元亨  
字惟乾湖廣武陵人學以務實不欺爲主而謹於  
一念王文成在贛時屬以教子已令主濂溪書院  
諸及門之士時時提省剖析令學造不懈諸同門  
嚴事之時宸濠謀逆而浮慕王文成書問學爲名  
高文斌乃遣元亨徃見之冀有感動濠調以他語  
元亨若不喻獨詳與論學濠退拊掌大咲曰人癡  
一至是耶然以文成故禮待之一日講西銘至父  
母宗子元亨反覆言君臣之義本一體語主於感  
諷濠乃大恚猛大詫濠素暴異時每大詫人立死

左右爲驚懼失措元亨從容理前語如常濠曰此生亦大有膽氣贈金遣還元亨歸金有司文成聞亟遣人從間道逆之歸及張許索纒卽訊濠曰聞主某故與殿下通行乃賣殿下爲功有諸濠不承曰無有張許屢詰之曰獨嘗遣冀舉人與我論學來張許乃大喜急掩捕元亨脩榜掠炮烙迫使誣文成通濠終不伏文成大痛苦然憚俱禍不敢訟言救之謗稍定乃脩咨部院白其寃言本生懷報國之忠篤事師之義而橫被寃枉義當與之同死辭甚懇會科道交疏論救事得白顧以病卒獄中

同門陸澄應典輦爲棺斂歸其喪計聞文成哭之  
慟移文恤其家元亨篤信力行忠誠惻怛視人猶  
已在獄視諸囚殊不異一體諸囚皆感泣向善湖  
廣按察司逮其家妻李與二女俱不怖曰吾夫平  
生尊師講學豈有他哉獄中治麻臬不輟暇誦書  
歌詩事且白守者欲出之李曰未見吾夫吾出安  
歸按察諸僚婦召見辭不赴已潔一室就見則囚  
服見手不釋麻臬問之學曰吾夫之學不出閨門  
衽席間聞者悚然嗚呼可以觀學矣

黃宗賢綰太平人尚書文毅公曜孫也爲童子卽知

棄舉子業勵志聖賢之學以蔭補後軍都督府都事文成自廬陵入覲來見語學文成喜曰此學久絕君何所聞曰雖粗有志實未有聞文成曰人惟患無志何患無聞訂與終身共學宗賢於其言如渴而飲無弗入也後二十年聞文成致良知之旨大歎服復執贄稱門人先是方獻夫叔賢與文成同官吏部位其上聞語學有省屬已師事之已歸西樵學稍異其後與宗賢誠甫議大禮於上意合召纂修明倫大典宗賢不欲行文成諭之曰議禮本諸君始其事中間萬一猶有未盡正可因此

潤色調停今元山以日疾未能躬事方霍恐未卽  
出二君復不往則朝廷之意益孤而元山之志荒  
矣務潔其身者楊氏爲我之義君子之心未嘗經  
硜若此也後官宮詹與方同被倚信文成亟稱古  
之太賢斷斷休休風切諸在位深至語具相謨中  
文成卒以吏尚書萼議奪卹典禁學疏力諍家難  
作復以女女其子正億紀綱其家卒立之後復與  
柄臣孚敬隙調外任吏問書鉉逢孚敬意以僞學  
醜詆之疏力辨上終有之諭孚敬曰卿能與綰  
篤舊好卿之益亦多又諭鉉私不害公蓋調劑議

禮臣如此以禮侍郎定雲中之難還進禮尚書方  
後官大學士柄國自有傳文成官吏部時穆伯潛  
孔暉鄭朝朔一初王純甫道黃宗明誠甫應元忠  
良皆就學朝朔朔人也官御史聞文成論學心契  
之因陳世傑請受學文成告之克念與剖隱微窮  
原本連日夜朝朔喜以爲昔多岐而今大道也時  
已得疾人曰盍少休朝朔曰夕死可矣後竟卒是  
時姑蘇徐昌穀禎卿者與李慶陽獻吉業古文有  
章已諷仙經悅之故與文成善與論中舉文成笑  
不應昌穀曰子以予爲非耶將又有所秘耶夫居

有者不足以超無踐器者非所以融道吾茲去知  
故而宅心埃壒之表而子猶予拒何也文成曰謂  
吾爲有秘道故無形也謂吾謂子非子謂吾是也  
雖然試言之夫去有以超無無將奚超矣外器以  
融道道器爲偶矣而固未嘗超乎而固未嘗融乎  
夫盈虛消息皆命也纖巨內外皆性也隱微寂感  
皆心也存心養性順夫命而已而又奚所趨舍於  
其間乎昌穀首肯者久之曰冲舉有諸曰盡鳶之  
性者可以冲於天矣盡魚之性者可以躍於淵矣  
曰然則有之曰盡人之性者可以知化育矣昌穀

俛而思蹶而起曰命之矣吾且爲鱗甲吾且爲流  
澌子其煦然暘我以陽春哉然時已屬疾已竟卒  
純甫武城人舉進士受學出掌教應天上下不相  
協文成貽書曉譬之以爲譬金在冶經烈焰受鉗  
錘爲金者甚苦然自他人視之方喜金益精煉惟  
恐火力煅煉之不至及其出冶金亦自喜其煅煉  
之有成也又自咎平日每有傲視行輩輕忽世故  
之心及謫官三年百難備嘗然後能有所見以感  
之及文成官滁陽而純甫疑於學致書言學以明  
善誠身固也第不知何者謂之善原從何處得來



今在何處其明之之功當何如入頭處當何如與  
誠身有先後次第否誠是誠箇甚的此等曲折儘  
欲扣求啟發因獻所疑以自附於助我者文成得  
書欲不荅恐其自是荅之無從入也已念純甫自  
是乃其心有所蔽而然非自知其非而故爲是以  
要我者何可以遂已乃復諭之曰反覆來諭純甫  
之得力處在此其受病處亦在此蓋純甫平日徒  
知在心之說而未嘗實加克治之功故未能動靜  
合一而遇事輒有紛擾之患今乃能推究若此必  
已漸悟往日之墮於空虛矣故曰純甫之得力處

在此然已失於支離外馳而莫之覺矣夫心主於身性具於心善原於性孟子之言性善是也善卽吾之性無形體可指無方所可定夫豈別爲一物從何處得來乎純甫之意蓋徂於近儒之說以爲事事物物各有至善必從事事物物上求之而後謂之明善蓋純甫之心殆亦疑我之墮於空虛也故假是說以發我之蔽吾非不知感純甫此意而其實不然也夫在物爲理處物爲義在性爲善因所指而異名焉耳實皆吾之心也心外無物心外無事心外無理心外無義心外無善吾心之處事

物純乎理而無人僞之雜謂之善非在事物有定所之可求也處物爲義心之得其宜也義非在外可襲而取也格者格此也致者致此也必於事事物物上求至善是離而二之也夫誠者無妄之謂誠身之誠則欲其無妄之謂誠之之功則明善是也故博學者學此也審問者問此也慎思者思此也明辨者辨此也篤行者行此也皆所以明善而爲誠身之功也故誠身有道明善者誠身之道也不明乎善不誠乎身矣若明善自有明善之功誠身又自有誠身之功是離而二之也後曰仁至南

與純甫洞剖師旨而純甫乃益親

原忠台仙居人舉進士入翰林爲庶吉士正德中以父老歸侍蕭然山中講學授徒養親者十餘年世宗入繼統召還授翰林編修尋以直諫杖闕下罷官

黃誠甫字宗明



人也溫良澹泊有經濟之志嘗

問顏子爲邦爲萬世立常行之道信乎文成曰顏子具體聖人於爲邦大本大原夫子信之故獨舉制度文爲而言謂如是而後盡又不可以本領既立而防範或濶疎也故又以放鄭聲遠佞人告之

此皆就顏子所至而語若在他入須告以達道九  
經及明善誠身則萬世常行之道也苟無其本籍  
令必行夏時必乘殷輅必服周冕舞韶樂豈有益  
哉蓋箴其微也其後誠甫以郎中議大禮起外官  
至禮侍郎鄒考功守益與書言今天下扼腕言禮  
樂矣其亦易惡至中以端其本乎其亦比擬鑽研  
以鋪張於枝葉乎 聖明在上寤寐堯舜而中和  
位育睟乎唐虞何也來教發揮大學而曰經文其  
命脉三禮其皮膚經文其準繩三禮其平直  
先後緩急可謂善握其機矣更望洗心積誠爲

主上精白言之先師平口精神脩在大學而未盡展  
布天其有意於今日之夷夔乎蓋規切如此未幾  
卒其後文成望益高弟子彌衆進其著者在浙則  
有若陸清伯澄季明德本張元冲徐汝珮珊在廣  
則有若楊氏薛氏昆弟在直隸則有若王汝止艮  
孟伯生源周道通衢在福建則有若馬明衡子莘  
林以吉而文成官江西最久從受學者至衆而吉  
中爲盛在新建則有若魏氏兄弟在臨川則陳惟  
濬南昌則王公弼之倫

薛尚謙侃潮揭陽人也事文成留都者三年志專意

篤省克深至歸以所聞者告其兄尚賢尚賢以博學有行箸信於鄉間尚謙少師事之至是聞尚謙語而大說盡率其羣弟子姪謁文成虔州受學焉而學造愈精尚謙嘗自省好名之病難克也以爲好名者非必務外爲人但聞譽而喜聞毀而戚皆從名根來文成曰然名與實對務實之心重一分則務名之心輕一分全是務實之心卽全無務名之心若務實之心如饑求食渴求飲安得有工夫好名乎又嘗自咎罪疾以爲輕傲二字爲累也又自多悔一日去花間草曰天下間何善難培惡難

去蓋其念也文成警之曰未培未去耳少間曰賢此看善惡皆從軀殼上起念故錯未達曰天地生意卽花草何擇賢欲觀花故以花爲善以草爲惡如令用草時復以草爲善矣卽此善惡皆從汝心好惡所生故知錯也曰然則物無善惡乎曰無善無惡者理之靜有善有惡者氣之動不動於氣卽無善無惡是謂至善曰佛氏亦稱無善無惡何以異曰佛氏者在無善惡上便一切將善惡廢置故不可以經世聖人無善無惡只是無有作好無有作惡不動於氣然遵王之道會其有極一循夫理



便自有裁成輔相在曰草旣非惡卽草不當去乎  
曰草有妨礙何妨汝去曰去之非作惡乎曰不作  
好惡非全無好惡也惟好惡一循於理而纖毫意  
氣不與焉於未有好惡不異是不作也若與以纖  
毫意思卽心體爲之累而氣動矣曰如惡惡臭如  
好好色安得不着意乎曰此謂誠意非是私意誠  
意惟是循天理纖毫已意不與焉故有所忿懣好  
樂卽不得其正故學莫若廓然而大公蓋進之正  
心其後篤信良知之學乾惕著察於惛然之體旣  
中廢喟然曰此天所以玉吾學於成也研極精奧

作研幾質疑錄以辨學皆從實際理地發揮病億  
測害道曰開拳見子箇數分明不勞猜量病心累  
於物曰是非逆順境界猶時有礙乃知裏許盡是  
私意歐文莊歎以爲梅子黃熟中邊皆甜非可以  
虛見領受云病亟猶手書寄同志矢盡滌偏蔽酌  
夙志爲無負學者稱爲中離先生尚賢官國子助  
教尚謙舉進士官尚書郎嘉靖中與魏給事中良  
弼糾柄臣孚敬罪落職不復召卒

楊仕德驥弟仕鳴潮陽人初仕德從湛編修遊有立  
已受王文成學篤信焉仕德卒湛誌其墓以爲心

心相持如髡如鉗頗訾其失自然之宗文成以爲篤信好學之死靡貳朋輩未嘗有也其後仕鳴亦早卒文成尤痛惜之方鄒文莊官南雍時仕鳴往詣之謂鄒曰公往治舉子業已竭才否乎鄒曰竭矣曰今去欺求慊以致知亦才旣竭否鄒默然仕鳴曰微竭才曷由見卓爾竭才二字晞顏之的也鄒默受者久之其後每舉斯語告學者而太息其賢云

馬子莘明衡莆人也父思聰死寧濠之亂子莘立志精猛深詣卓然不惑於利害閩鄭繼之善夫亟稱

之頗留意於文辭文成箴之曰草木之花千葉者  
無實其花繁者其實鮮戒其溺也以監察御史言  
事落籍士論惜之

陸清伯澄一字元靜歸安人始謁文成於留都月一  
至已益親後請掃庾下之堂而旦暮侍焉清伯故  
豪俊後口雍雍默默慊慊自以爲不足也其記文  
成語首云持志如心痛一心在痛上豈有功夫說  
閑話管閑事蓋其篤也已欲屏絕文字專於學文  
成曰此恐志不堅定爲世習所撓之故而云然使  
在我果無功利之心雖錢穀兵甲搬柴運水何往

而非實學何事而非天理況子史詩文之類乎使  
在我尚存功利之心雖日談道德仁義亦直功利  
之事況子史詩文之類乎願一洗俗見還復初志  
當釋然融解矣其後以多病從事於養生文成曰養  
德養身只是一事果能戒謹不覩恐懼不聞而專制  
志於是則仙家所謂神住氣住精住亦在其中矣  
堯舜湯文周孔其萬物一體之心當無所不至苟  
可以長生久視者亦何惜以示人如老子彭篯之  
徒乃其稟賦實然非可學而至後世如白玉蟾丘  
長春皆彼學中祖述以爲師者得壽皆不過五六

十則所謂長生之說亦必有所指矣元靜但當遺棄聲名清心寡慾一意聖賢不當輕信異道樊精神靡歲月爲也後謗議大作澄官刑主事欲條爲六辨上之文成聞而止之曰無辨止謗嘗聞昔人之教矣况今何止於是四方英傑以講學異同之故議論方興吾儕可勝辨乎惟當反求諸已苟其言而是歟吾斯尚有未信歟則當務求其是不得輒是已而非人也使其言而非歟吾斯旣以自信歟則當益致踐履之實以務求於自慊所謂默而成之不言而信者也然則今日之多口孰非吾儕

動心忍性砥礪切磋之地乎且彼議論之興非必有所私怨於我彼其爲說亦將以爲衛夫道也況其說本自出於先儒之緒論固各有所憑據而吾儕之言驟異於昔反若鑿空杜撰之爲者乃不知聖人之學本來如是而流傳失其真也彼旣先橫不信之念莫肯虛心講究加以吾儕議論之間或爲勝心浮氣所乘未免過爲矯激則固宜其非笑而駭惑此皆吾儕之責未可專以罪彼爲也中引自咎深切澄乃止其後問照妄動靜文成啓告深至語具文成事中文成於澄最屬意謂曰仁沒吾

道益孤致望元靜者不淺潯執父喪毀失明矯湖俗於禮文成爲表其父墓仕至尚書郎

季明德本山陰人旣受學精思力踐慨然以聖人爲可學而至常兢兢磨練於事爲朋友之間患世之學者以自然爲宗忘其所有事習於情而偷自便也曰心之本體猶龍然戒愼恐懼天命靡寧主宰常惺矩則常定故潛見飛躍隨所遇而時應是以警惕主變化也彼以自然爲宗而不知惕若有同出於虛而卒流於物欲者矣患世學以講經爲病徇偏見蔽曲說任胸臆之所之而去道愈遠也覃



精於六經深研妙詣多所自得胡忠肅公稱其所著易學四同以爲默會義文周孔之心於千載之上足正諸儒先之論於千載之下雖謂集易學之大成可也唐宮詹順之稱其春秋私考能信斯人直道之心與聖人無毀譽之心同諸傳義例一切摧破如獨以身處其地推見其精而定其是非至地理古今之沿革姓名氏族之派別星曆之數度帝嘗郊社禮樂兵賦之纖悉古今之所聚訟而莫能決者皆辨析該貫昔之稱經師者莫及也始明德童年時於經義有深悟旣知學引伸觸長益妙

契而文成存時與書言看經書取其有益於學而  
已一涉拘執比擬則反爲所縛雖特見妙詣一時  
不無開發之益而意必之見流注潛伏有反爲之  
障而不自覺者矣後學成歐文莊亦以習心流注  
箴之蓋師友切磋入微者如此明德舉進士官監  
察御史以論禮補外時山陰有徐汝佩珊者舉鄉  
薦赴南宮舉見策問意詆學不對而出論者以爲  
尹彥明之後再見云

鄒文莊公守益字謙之江西安福人年十九舉進士  
及第授翰林編修外艱歸請王文成謁文成表墓

殊無意於學也文成顧日與之言學一夕忽有省  
曰往吾疑程朱補大學先格物窮理而中庸首慎  
獨何也乃今釋然蓋格致卽慎獨也已證之克復  
之受授愈益信或問之曰顏子資最高故告以中  
庸閫奧乃學者自當從大學讀書窮理循循入也  
曰又不然聖門如樊遲資最下劣乃孔子教之恭  
敬忠初無二語何哉渙然信天德王道一貫於慎  
獨遂納贄稱弟子師焉日津津有人歸溫粹冲夷  
異時居養諸氣體爲一變見者驚訝以爲從大治  
中鑄過來也未幾宸濠反馳軍門從征曰君臣師

生之義固然而切磋益深嘉靖改元錄舊臣起用  
明年謁文成越中旣別文成悵望不已門人問曰  
夫子何念謙之之深也文成曰曾子有言以能問  
於不能以多問於寡有若無實若虛謙之近之矣  
抵京復館職會大禮議起率同官疏爭不報明年  
復上疏忤旨下詔獄與修撰呂柟日講學獄中謫  
廣德州判官故事翰林謫官者不參公座不理政  
而先生顧以不閑政爲憂詣名流造問輒不契入  
會稽問文成文成曰善哉問舉大學如保赤子語  
約之於誠心於是隨在署四字以自勗建復古書

院以倡士學刻諭俗禮要以風民俗政化大洽間  
至越文成勞之曰往來越中者言謙之事上嗛嗛  
盡禮見學力也對曰官直應迹如扮戲者隨所遇  
輒應何得執哉文成默然良久曰書稱堯克恭克  
讓謙之信恭讓矣獨自省於克克何如先生恍然  
悟始之恭讓猶之玩世意也於是自克逾深遷南  
主客郎與同志日切磋於學考滿進階請告歸與  
同志論學如饑渴起南考功尋召爲司經局洗馬  
上聖功圖忤旨下禮部參勘則猶以議禮故失  
上意也遷太常少卿掌南院陞南祭酒會九廟災

諸大臣皆惶恐引咎自陳守益獨引殷中宗高宗  
反妖爲祥之說冀有感動遂罷歸先生恢廓善容  
納能忍人不能忍容人不能容於王文成嚴事尊  
信終其身言必稱先師始精思篤踐已渙然於卽  
寂卽感無二境界卽存卽省無二功夫卽知卽行  
無二塗轍卽安卽勉無二源流融融然渾渾乎於  
道而不自覺也晚自謂進不獲大行於時惟講明  
師說培養人才倡明道術爲實際自鄉國以至四  
方間居游從無一日不與衆聚講言溫氣和隨幾  
曲譬廣證隨事發揮而溫然一體之愛形於辭色

矢口成文疊疊動千百言俾聽者忘倦忿忘燥釋  
如奏雅樂聞九韶聽之不厭卽之而莫能舍也後  
時賢慧者語證悟深者研歸寂達者樂高曠精者  
研主宰流行頗訾先生爲言詮意見而先生守繩  
墨日諄諄於戒慎恐懼庸德庸言之訓不釋也其  
論寂感曰四時常行不論寒暑百物常生不論開  
歛故寂感無二時體用無二界論道曰就其不可  
覩不可聞超然聲臭處指爲道就其可覩可聞體  
物不遺處指爲器又曰古人發育峻極只從三千  
三百充拓不是懸空擔當三千三百只從戒懼處

體流出不是支節上檢點卑者安小成高者墮虛  
遠未可以語肫肫之學又曰悟得此意只從四時  
常行百物常生處見大極禮儀三百威儀三千處  
見真性方是一線出來若隱隱見得真性本體而  
日用應酬湊泊不得猶是縫隙在又曰人倫庶物  
日與吾接欲頃刻離之而不可得故庸言之信庸  
行之謹兢兢不敢放過如織絲者絲絲入筥無一  
絲可斷乃是經綸大經又曰先師提致良知三字  
本體謂之良知剛健中正純粹以精一毫夾雜不得  
工夫謂之致復其剛健中正純粹以精一毫因循不



得又曰除却自欺更無病除却慎獨更無學其自言曰昔見陽明先師時便知從良知上致却認得良知粗故包漫世情倚靠聞見終於潔潔淨淨處未肯着實洗刷此學不受世態點汗不賴聞見充拓不須億中測度不可意氣承擔不在著述繼往開來凡有倚着便涉聲臭於洗心神明處尚遠也可謂粹然儒學純一不雜矣先生凝重敦厚事親孝撫庶母弟敦愛有加立朝耻阿徇進退之節介然居鄉視里閭疾痛若痼瘕在身諸主清量明戶役悉力清畫爲垂久之計蒙怨謗必行其他周貸

宗族睦隣里繕橋梁廣陂堰皆畢力行病聚禱卒  
走哭鄉人尊事尸祝焉子孫皆以學世其家

歐陽文莊公德字崇一江西泰和人夙有異質蚤以  
書請學王文成甫冠卽舉鄉試兩不赴春官專於  
學忘寢食糜粥終歲文成以小秀才呼之欣欣供  
命雖勞不怠文成公大器之自是研窮剖析盡得  
其蘊奧涵浸者久之嘉靖初舉進士與門同舉者  
更僕共馬終講繹無間出知六安州以初政倥傯  
未暇學爲歎文成曰吾學乃在政務倥傯中遷刑  
員外郎改翰林修撰地清切學造淵而文成學益

大昌徐文貞爲編修賴以啓覺篤信之如師保公  
德性深厚提身恭遜喜怒不形於色而體悟洞暢  
所至汲汲以明師學求友爲務於人無賢智愚不  
肖待之溫然一體也羅文莊作困知記嘗良知公  
以鄉晚進事之甚恭而辯之甚力明知之良卽天  
之性文莊闢之愈峻而公恭遜和裕意氣不少加  
也士友好立論輒默坐不語真意薰感以切其內  
省之心每與學者言朋輩不得以異同生彼我不  
得困蔽我起異同故同志益親屢遷鴻臚卿丁父  
憂服除留終養以薦起至禮侍郎母卒扶柩南毀

廬墓服未闋特旨召拜禮尚書直內閣時

上深

居西內留意於玄修而執主要以操割天下動見拂劇朝廷大議下皆取具一時公卿焚臍不能決而分宜當國懷忮心公灼幾委曲相時裁化欲從容啓沃爲格心 穆宗在裕邸於景王並稱二王不得時見上 上頗諱忌儲貳傳代之事公於請婚慶賀康妃喪具儀上時時以繼體尊統之意別白具言之慮存深遠語黜張皇雖時被譴責終調紆將萌防杜於未然心則殫矣諸政關大體勢頗阻格殉之則貶道執之則忤時者未嘗不調劑燮

和而職思其當也

上眷優渥不衰卒贈賻有加

禮謚文莊

聶尚書豹字文蔚吉永豐人也舉進士知華亭有聲  
識徐文貞於諸生中教引植立之官御史指斥巨  
鎬及大臣不職者屢屢風裁凜然守平陽北虜入  
塞旁郡多敗衄豹守禦方甚設卒抗賊事聞世  
宗手勅問相臣平陽守獨能禦賊其爲誰以按察  
副使備兵潼關爲貴溪所忌惡罷歸有薦者忽有  
旨覈守平陽時守禦費多科歛逮於理會貴溪敗  
徐文貞爲力保護得釋歸庚戌虜大入以故官起

備虜道中三遷兵尚書爲本兵時 世宗威斷不  
測殫心力周幹區畫分宜相邊總督邊大帥咸以  
賂進退訖不得行其志會倭寇閩廣分宜薦所幸  
趙文華往視師持不可勒致仕卒贈少保謚恭襄  
先生官御史時謁王文成于越與語學有契旣別  
致書言思孟周程無意相遭於千載之下與其盡  
信於天下不若真信於一人道固自在學亦自在  
天下信之不爲多一人信之不爲少時方忌學已  
毅然自奮如此然始未納拜及文成薨信念深於  
閩中爲位哭稱門生已與同志功礎益深密而專

之主靜切益深堅被逮時方與學子講中庸校突  
至繫械之見者膽墮先生就械無幾微動顏色就  
械已徐理前語如初已就道父老追送者皆流涕  
油若也於途中與朋輩日論學無須史間錄之曰  
因辨錄以明學而主於歸寂功在收攝保聚其言  
曰中庸言獨易言密言虛言寂言獨復獨立四者  
同出而異名自我有之自我主之小而辨精而明  
尊而無對獨之謂也言天下之至一也根極領要  
覩聞俱泯而機緘之妙鬼神莫窺密之謂也言天  
下之至精也默識靜專龍蟄淵沉靈明內蘊神妙

萬物寂之謂也言天下之至止也內不見已外不見人其淵其天而空洞之體其受命也如響虛之謂也四者異名均之爲未發之中虛寂言湛一之體密獨言歸止之奧而收攝保聚必於乾乾惴惴欽明祗畏中得之故敬者聖學始終之要然其論頗倚於寂曰良知本寂感於物而後有知故必自其寂者求之使寂而常定則感無不通而天下之能事畢矣故能廓然太公自能物來順應有未發之中自有發中節之和於事物動用處而格致者義襲者也時頗有諍論而羅文恭信之特深



皇明書卷之四十四

新城草野臣鄧元錫錄

心學述

羅文恭名洪先字達夫吉水人世所稱念菴先生者也  
幼端重有志於仙禪會良知之說行嚮往之常擁  
膝危坐自收攝嘉靖己丑舉進士第一授翰林修  
撰引疾歸欲畢志於學過越見王汝中畿汝中言  
良知見成神觸神應大說之已反之凡心習氣包  
裹爲祟不自信也見恭袞就逮時先已不動心大  
敬服求未發之中益攻苦夜減食焚香塊坐一榻

至連霄不寐防危守獨爲兢兢聞有爲性命之學者則幾寒犯險遭逆旅捽詈往從之不悔其言曰學者自有生以來積染成習如油入麪未易脫離須終日酬應終日消磨不使習氣乘機潛發方不負此生又曰必安頓收斂枯槁一番而後可以語良知之通塞又曰善學者竭才爲上解悟次之聽言爲下恃妙契而不務反躬以一念之明爲極則以一覺之頃爲實際而欲隨事隨物流行順應未有不倚見解言詮爲支吾者也其寐言曰自震而離而兌陽之浸也自巽而坎而艮而坤陰之浸

也自內而外謂之徃徃主發生自外反內謂之來  
來主歸復易有太極逆也生兩儀則順矣數徃者  
順其後天乎知來者逆其先天乎故月從逆爲朔  
徵之吾身目不逐境而內觀耳不逐聲而反聞心  
絕物誘而忘智口絕言筌而守默自外來感者我  
無馳也以是爲未發之中故其學於靜中常蟄常  
隱伏強陽消頡滑者久之洞啓天門靜聞寒漏恍  
然覺中虛無物如長空雲氣流行無止極如大海  
魚龍變化無間隔也無內外可指無動靜可分上  
下四方徃古來今渾成一片吾之一身乃其發竅

固非形質之所能限也而學益玄以深中歲復召  
爲春坊贊善爲貴溪所惡擠之會疏請預定

東宮朝儀遂罷歸築室石蓮洞掩關却掃謝世不  
涉分宜當國數致書欲致之竟謝不復起卒隆慶  
初贈光祿卿賜謚先生事親孝遇族父兄恭處鄉  
里恂恂父憲副公自有傳憲副公遇先生嚴旣貴  
訓勅不異童穉稍失意辭色必厲客至令行酒拂  
席授几如異時先生從事欣如也憲副公卒苦塊  
柴毀不入內三年平生於辭受取與最嚴當路常  
餽絕不納方引疾時抵儀真病殊殆同年項侍御

喬按江北日就訊瓜洲富人坐重罪飾名姝介萬  
金求居間峻拒之項微聞以其意嘗先生先生厲  
聲曰君未聞志士不忘在溝壑乎項太息以爲不  
可及也晚益高峻布袍芒屨居閒樂道士大夫仰  
之如景星慶雲可望不可卽云

先是文成官南鴻臚時吉安福劉伯光曉以世誼往  
謁之聞語學有契由是確然信爲仁由已也遂師  
事學焉文成贈之詩有一語悟真機之歎歸日與  
其族父宜充君亮等共學而聯同志月爲會五日  
曰惜陰文成爲著惜陰說已鄒文莊還自辟雍而

吉學大昌曉孝友謙和語由裏無支蔓一日誦少陵語不驚人死不休之語喟然曰嗟乎不當謂學不聖人死不休耶恒爲學者舉質鬼神無疑之語曰人可欺鬼神不可欺今世可欺後聖有作真僞不可欺其自勵如此而羣從宜元君亮皆成德爲人士所尊信云

卷

劉宜充諱文敏少稟純固旣聞學自勵曰學苟不成猶不學也躬踐默證者久之覺動靜未融乃嘆曰非親承師授不可矣詣越見文成學焉而後沛如也其學以致心之良知爲宗而操存瞬息不少懈一

主於躬其言曰知體虛明皎如白日無少自欺卽  
權度在我無微不照知其蔽當切磋琢磨則切磋  
琢磨之密而不以爲助知其功當人一已百則人  
一已百之勤而不以爲苦積累可以日升檢束可  
以日強良知之蔽日去良知之體日明德崇業廣  
而至誠可幾又曰一念判決旣明則聖凡燕越道  
德仁義之習自將日新月熟欲罷不能又曰吾性  
常生常止往來起伏非常生也專寂凝固非常止  
也生而不逐是謂常止止而不住是謂常生無住  
無放常感常寂纖毫人力不與焉是謂天然自有

之則又曰除却見在有分辨之知更思天衢與門  
內皆懸想也故有同異無端之可疑良知真體萬  
古一日萬變一致益精益動益虛而不惰則染處  
漸消逐時漸寡查滓渾化則主宰卽流行之主宰  
流行卽主宰之流行安得許多分別疑慮又曰謂  
吾性一見病症自去此玩光景逐影響欲速助長  
之爲害也須精辨之又曰意念每治每然吾則每  
然每治其用力雖至於已百已千皆困勉者本等  
職分不可欲速不可中止又曰鋒芒機械兩名而  
一病學者以道理文客氣最骨髓深痼隱微之痛



孰察而孰去之又曰於人是非長短一起忿嫉之  
念卽蛇蝎虎狼蓋蛇虎見人卽怒也又曰格心者  
忠之大養志者孝之至君子之忠如臨上帝君子  
之孝視於無形又曰務博索玄厭苦求靜皆欲根  
未淨當切磋不懈執中之功本於精一鵠皜不可  
尚亦自濯之暴之中來謂戒慎恐懼可須臾離乎  
又曰功利之習淪肌浹髓非鞭辟近裏常見無動  
之過不足以勝隱微深痼之病諸異時喜頓悟而  
厭積漸任超脫而畏檢束談玄妙而鄙淺近肆然  
無忌而以爲無可無不可任情恣意遂以去病爲

第二義者防之爲兢兢羅文恭贈之詩曰嘆息卓爾域千古能幾諧目擊中有存意會言無乖王光祿時槐從受學稱其岐特壁立不可正視而淳樸無絢飾有太羹玄酒之味精明勇詣於天人死生之理如指諸掌屋漏不愧童孺皆孚而言訥行庸若菽粟布帛之無異於人也其教人一循其本然之知省克於念慮實踐於倫物未嘗爲竒僻險絕之語未卒前語學子曰知體本虛虛乃生生與後學言卽塗轍不一勿違吾宗可矣年八十餘卒學者稱兩峯先生督學使者邵型下郡言劉某力探

聖域倡明正學其令所司具粟帛羊豕往佐其喪  
學官弟子議所以應祀典者列狀上祠祀之後有  
督學者奉江陵旨汰從祀本欲汰劉御史臺父顧  
併汰先生小人之無忌憚如此云

劉君亮諱邦采始學時每竟夕不寐以思有造矣已請  
越從王文成學有一諾千古之許文成大稱賞之  
學者來質疑必曰問君亮已恍然氷解於混一不  
二之體悟良知充滿無不足不得也曰滿地黃金  
顧將作鐵使乎自此忘虧成是非獨與天倪俱久  
之內自省受命駁而氣習之滓未有汰也則深悟

於主宰之真靜者性也流行之凝精者命也主宰  
流行之變化者意也主宰常一所以盡性流行常  
精所以修命學之爲主宰流行之交致者終不可  
混也著易蘊一篇以見意盡性修命老斲斲不息  
諸語證悟者姍笑之而羅達夫洪先獨深信欲爲  
箋其文以傳其緼曰夫學何爲者也悟性修命知  
天地之化育者也往來交錯庶物露生寂者無  
失其一也冲廓無爲淵穆其容臍臍者無失其精也  
惟悟也故能成天地之文惟修也故能體天地之  
塞悟實者非修性陽而弗駁也修達者非悟命而

弗望也性隱于命精儲於魄是故命也有性焉君子不  
滑諸命也性也有命焉君子不仗諸性也原始反終知  
之至也又曰有感無動無感無靜心也常感而通  
常應而順意也常往而來常化而生物也常定而  
明常運而照知也見聞之知其糟粕也象著之物  
其凝滬也念慮之意其流澌也動靜之心其遊塵  
也心不失無體之心則心正矣意不失無欲之意  
則意誠矣物不失無住之物則物格矣知不失無  
動之知則知致矣身心意知物者工夫所用之條  
理格致誠正修者條理所用之工夫知所先後者

始條理也天序也又曰忘其所有事者昏索其所  
無事者紛昏不勝紛者雜紛不勝昏者塞紛猶夢  
也昏猶醉也醒醉遣夢者惺惺也瞬有存息有養  
前無迎後無將何病乎塞何憂乎雜又曰德非潛  
不光心非淡不休識恒欽曰潛欲恒釋曰淡淡以  
平感物而動之情潛以立人生而靜之本是故清  
明在躬志氣如神潛且淡者與又曰已者命之所  
稟禮者性之所具人之生也性一而命殊故人之  
過也各於其黨虞仲之放伯夷之隘下惠之不恭  
子貢之達子路之勇原憲之得曾點之狂子張之

堂堂皆已也雖痛克之猶恐守已者固而從人者輕也惟堯舜爲能舍非竭才不能克是故能見無動之過通乎微矣能淨無垢之塵可與幾矣草昧之險無動之過也野馬之運無垢之塵也故聖人洗心退藏於密神武而不殺也夫又曰能心忘則心謙勝心忘則心平侈心忘則心淡躁心忘則心泰嫉心忘則心和謙以受益平以稱施淡以發智泰以明威和以通志成性存存九德咸事又曰心之爲體也虛其爲用也實義質禮行遜出信成致其實也無意無必無固無我致其虛也虛以通天

下之志實以成天下之務虛實相生則德不孤是  
故常無我以觀其體心普萬物而無心也常無欲  
以觀其用情順萬事而無情也又曰見玄而不影  
響者鮮矣務博而不支離者鮮矣見過以致玄玄  
而質也務約以致博博而寂也高明效天博厚法  
地弘心澄意之學也又曰感應而無起滅太虛之  
流行優優生化之學也著察而落感應照心之爲  
用憧憧往來之私也優優則時止時行議擬以成  
變改過遷善同歸於不識不知而已焉又曰伯玉  
不以昭昭申節冥冥脩行感應之著察者也原憲



之克伐怨慾不行著察之感應者也念念謹念其知也遷念念一念其知也凝顏子不善未嘗不知知之未嘗復行主宰流行明照俱至猶之赤日麗空照四方而不落萬象矣曰明道之獵心復萌見林木之嘉者起計度何也曰斯固顏子之學過而不成念者也未嘗嬰明體而起知端曰然則曾子之易簣得於童子之執燭非嬰明體而起端乎曰猶之日月雲滂空照一也蓋良知流行變通有定從而無典常曾子之以虛受人又非過焉改焉者可論也曰其謂得正而斃焉何也曰正無定體惟

意所安是故學莫踰於致知訣莫要於知止又曰  
多聞不畜聞無聞也多見不宿見無見也獨聞者  
塞獨見者執小成而已矣是故君子多識前言往  
行以畜其德大畜也又曰九容不修是無身也九  
思不慎是無心也九疇不叙是無天下國家也修  
容以立人道慎思以達天德叙疇以順帝則君子  
理此三者故全也又曰建極在君修極在公卿遵  
極在守令徵極在庶民父慈子孝兄友弟恭庶民  
徵矣省刑平稅敬老慈幼守令遵矣尊賢任能謹  
度宣化公卿修矣敬天勤民禮叙樂和皇極建矣

惟皇作極惟帝時克一哉王心協哉衆志元氣充  
塞太和保合人感天應雨暘時若寒暑不侵治之  
極也伯光仕爲令宜充君亮俱棄舉子業專於學  
已君亮以聘舉鄉試仕爲泰寧教諭同知嘉興府  
學者稱師泉先生先生與學者語不啻唯危坐默  
對有問隨酬折卽片言能開人夙昔沉錮有鍛鍊  
令人躍然自化有開剖令人躍然疾亟門人朱調  
問先生此際視平日何如公曰形詎能累性哉今  
吾自若也遂瞑同邑三五先生劉一舒陽幼從劉  
伯光先生學舉子業讀性理大全忽有省動希聖

之志間以白伯光伯光喜出所聞於王文成者告之則大動時文成開府虔卽奮請往受學適歲暮立負笈冒風雪造焉除夕旅宿十指僵皴不能屈伸欣如也元日奉伯光書因冀惟乾以見翼日病王文成問惟乾曰吉中昨來者生今安在以病對曰是生少然行且享予清福可教也明日入惟乾以告俾前謝文成曰欲享清福惟能辛苦者得之自是薄滋味忍嗜慾專於學篤深與同志羣處竟日夕默坐無一語退與之直規遠諷真意懇惻俾聽者自動也其讓善下能退然以其身下之故學

造日深察其志慄慄乎懼泥滓之汙得毫毛入其  
心昭昭乎志揭日月而行之也其言曰知者心之  
神明也知善知不善知好善知惡不善知必爲善  
知必不爲不善是至善也是人之明德也天之明  
命也故曰良致言學也致者力而後天者全曰明  
明德曰顧諟天之明命舉致之之謂也五常百行  
明焉察焉神明克周是謂能致其知古聖人莫如  
堯贊帝堯曰欽明非知之至而何中知之不倚於  
聞觀者也敬知之無怠者也誠知之無妄者也靜  
知之無欲者也寂知之無思爲者也仁知之生生

與物同體者也各指所之而皆指夫知之良也故  
曰致知焉盡矣有不善未嘗不知知之未嘗復行  
知幾也夫知微知彰知柔知剛曰萬夫之望曰知  
幾其神又曰獨知之明大明縣象照臨天下者似  
之盍觀於晉人有失則者明入于地矣有邪僻之  
見者入左腹矣盍觀於明夷又曰著焉察焉無或  
遺焉者聖人之無不知踐焉履焉無不勝焉者聖  
人之無不能洽聞亦知多藝亦能闇於其大者矣  
又曰庶物曰明人倫曰察天道曰明民故曰察曰  
事天明曰事地察稱聖人者必言明言察知之至

者也又曰知與行一爲真知言與行顧爲德言據  
拾者盜支離者僞盜與僞道其不行矣夫又曰至  
健者知之健至順者知之順唯健也不可險之而  
知險唯順也不可阻之而知阻人心惟危險阻之  
謂也健順精一之至也君子益無時而不懼夫危  
也又曰置我身於人人之中而非之是之惡之愛  
之奪之予之者夫然後可與無我又曰諸情先欲  
諸不善起於欲欲遂則侈欲滿則驕欲拂則怨欲  
喪則戚欲沮則摧欲急則躁欲爭則忮欲深則婪  
欲苟則污欲牽則迷欲窮則亂欲者不善之端也

小則過大則輕生禍倫滅天理而縱之故欲消俱  
消欲淡俱淡欲至於無情之順也性之靜也天地  
之真也又曰許友以不爽而爽者非相欺也意氣  
也意氣以相許能不爽乎其自許也亦然故許之  
心者則如季子之必酬非以酬人酬我也又曰同  
善而異拂君子容有是乎譽我從而善之毀我從  
而弗善之君子容有是乎諍我貌受之不裏受之  
君子容有是乎責善之言得吾情者德之不得吾  
情亦德之君子之心也又曰水之激失水之真矣  
情之激失情之真矣君子之情不激也故不激其



言又曰同異之辨得其情而喻之可也徒以異已  
輒詆之又不得其情非自蔽耶在昔有之如刑獄  
之寃具存而可睹矣又曰聞人之不善懲創之益  
少而潛損爲多故言人不善自損也又聽者損以  
鄉舉仕爲碭山令碭山瘠又三歲再歎山澤多亡  
命咨吁撫摩有惻怛之愛簡士而教之士以丕動  
表孝子閭祭節婦墓而俗化興料民授役城築子  
來而武備畢修河決新渠齋河濱者七日而禱願  
以身請命河忽自䟽者數十里以薦入臺爲御史  
永禧宮成以禱祠百官表賀同官推爲首曰此當諫

卽不諫可復賀耶於是臺官獨不賀時分宜當國  
曲加禮延至引疾歸徐文貞心服焉比當國以薦  
與吳御史惲並召辭不赴先生少失恃鞠於祖母  
慈孝篤深事父孝終孺慕父歿執喪毀廬墓貞孤  
一節而清和具體惓惓訓誘故賢智愚不肖畢歸  
心焉晚築雲霞洞于三峯以棲素琴古易枕几瓢  
笈皆箴銘四壁蕭然而從之者成市自東廓先生  
沒學者師尊之如公卒之日哭之者如雲自庭達  
閭巷聲不絕共建祠祀焉余西游及從諸先生游  
指擘自文莊公鍛鍊自師泉先生而受三五先生

遇最深厚善故具次其事是時海內言學者稱吉  
安稱安福泰和萬安有劉憲副秉鑑劉虞部魁尹  
太守一仁王子懋釗之倫憲副正德中舉進士授  
寧津令羣盜亂圍寧津堅城以兵憲斬盜首五百  
級得賊酋 武皇帝南征 世宗繼統治境先後  
供億身勤而下不擾糾巨閹罪遠詔獄謫官初受  
學甘泉已篤信王學諸及文成門受學者輒恂恂  
下之謫官潮貳守以所學勵潮之人自執彌下布  
忱懇惻潮人感而學者衆所至祀名宦祠郡邑鄉  
賢祠虞部以鄉舉入官判寶慶知鈞州同知潮州

府所至民思陞工部員外郎上安撫十事疏修外  
城垣主黑窰廠詔立雷壇祀雷神魁主黑窰廠以  
其職諫言陶埏之艱請節土木費杖闕下繫詔獄  
與楊御史爵周給事怡在獄講習人稱三君子旣  
釋未抵家復逮貽家人詩有孤臣此日勞 明主  
萬里何心覲此生之句後以三殿火釋歸卒魁受  
學王文成歸事鄒文莊人稱其篤志力行守官廉  
惠祿頒三黨家不遺羸直道事人宦不期達留滯  
州郡十八年不遇矣一躋郎署忠義矯然濱死彌  
厲而氣宇和穆薰然襲人以爲養盛自致焉子懋

始受學梅源東廓二先生既學於王文成聞輒信  
信輒學學輒不已輒欲以及人未嘗一日不勤懇  
於心其事親孝事兄如事父與弟鏡鑄爲同志家  
庭切僣朋友之善喜成之有未善規諷切切與人  
子言依於孝與人弟言依於弟與鄉間言依於忠  
信禮義人不善規不諷而直不忌於廣座衆人然  
相成之意懇惻由衷逆人耳而人心厭服之不怨  
也家旁落不留情生產衣食不耻糲糲而中欣欣  
由若也安成論學者至衆而論講學者不空談必  
曰王柳川云

新建魏氏兄弟良弼師說良政師伊良器師顏良貴  
師孟也文成撫江西時昆季胥從受學唐御史龍  
時巡按江西邵副使銳時督學皆守舊學疑之謂  
諸生言王公天資高難學諸生各務實守常業毋  
奔謁爲虛談時從游者頗憚避而師伊兄弟及南  
昌王公弼臣鍾明應文奎吳維良子金毅然不爲  
動師伊孝友敦朴渾然天成而聞道最早燕居無  
惰容嘗曰學問頭腦旣明惟專一得之氣專則清  
精專則明神專則靈又曰不尤人何人不可處不  
累事何事不可爲發解江西乃遂卒兄師說嘗言

夢中見良政輒流汗浹背其生前可知

師顏性超穎絕人旣受學而涵養深純卓然以顏子爲嚮往冲然恬於道而溫恭敏妙善啓迪來學文成歎之曰得師顏而門人日益親居越中久卽文成家帷薄骨肉密爲調劑而合也旣屬疾恐爲親憂日宴笑如常一日請父母兄弟與宴語忽曰今日似少瘳喜酒飲也父母喜具酒酒至飲奉觴請家大人同飲又請兄弟飲已謂兄弟曰吾病尚不勝冠履也舉以其所有分遺之已而曰吾倦欲假寐旣就枕遂瞑其處死生之際暇豫至於此王汝

中爲諸生敏妙不說學居與文成隣不見也師顏  
溫巽善入多方誘諭之乃受學後稱高第深感之  
曰師顏生我也師顏卒汝中語及必流涕歐文莊  
哭之文甚哀後巡撫何公遷立石表其墓

師說嘉靖初舉進士知松陽縣召入給事中累遷至  
禮科都給事中在諫垣七年論諍章數十上其大  
者則論保定侯梁永福兵尚書王時中大學士張  
孚敬吏尚書汪鉉及論救都御史王應鵬南京御  
史馬敷諸人每疏上輒廷杖杖已或釋或下詔獄  
杖癰或小愈或未愈又 旨下復杖獄卒爲流涕



腎至無膚而直聲動天下 世宗至明武於永嘉  
特親故素困楚之以快忿然終念之曰小秀才狂  
却有膽故終不奪其官已大察張汪共擠之竟罷  
歸公清標秀骨風神灑然目光如秋水淵澄瑩碧  
骨森峻家食四十年講求性命之學亦殊好養生  
家言知命後屏居村塢朔望還家謁先祠與夫人  
列坐對談談畢輒去不入內足不履城郭接引後  
進貌恭而言厲見者意銷縉紳以爲模楷晚歲忽  
買四書五經性理諸大全書甚具或問之曰課幼  
子稚孫乎曰不然吾何敢不愛日吾自課讀之旣

耄不釋手益狎與譚仙術者處卒無獲而一意於  
聖修隆慶初錄用忠鯁公篤老進太常寺少卿致  
仕卒後文成歸越來學者日進往來恒數百同門  
爲之語曰江有何黃浙有錢王黃何者謂雩都何  
性之廷仁黃正之弘綱錢王則餘姚錢德洪寬山  
陰王汝中畿廷仁始有慕於白沙之學已弘綱受  
學虔州歸語之學卽慨然走虔從受學居母憂斬  
然以禮自度與人語必依於所學歐歐懇款如有  
味乎其中而不能吐者伺聽者意解乃已其言曰  
學須從起端發念處察識知過卽良知改過卽致

知語學者涉精深輒握手相戒以爲先生語無  
也仕爲新會令始至曰吾不及白沙之門今幸  
其學敢以俗吏臨其子弟耶釋菜於其祠而後  
事政尚簡易政暇就祠中申主靜無欲之旨士  
興者遷南工部主事分司儀真推貨蕪湖所至  
有碑識思家故豐及聞學勇於克己急於徙義  
於推恩卒之日囊無餘金稱貧而後襄事弘綱  
文成門甫三日輒悟心理合一之旨文成沒與  
吉州諸同志繹舊學不輟領鄉薦授汀州推官  
遷刑主事以直道忤宰執謝病歸

王良字汝止泰州安豐場人場俗故業鹽無宿學者而汝止孝親出天性寒日見親以急驚盥冷水乃痛哭曰某爲子而令親天寒盥冷水乎何用爲人出代親役入掃舍奉席晨省夜定如古禮惟謹又之行益純忽心量洞明悟性無礙而天地萬物爲一體自此行住語默皆在覺中題其坐曰正德六年間居仁三月半卽悟人時已能如此於是謝役秉禮爲儒者而人未之識也益有年王文成以副都御史撫江西矣江西人有客安豐者聞良說論語詫曰此絕類王巡撫公之談學也汝止乃大喜

卽日造江西服古冠服執木簡賦二詩爲贄以賓  
禮見文成異之下階迎入良長揖上坐論學居數  
日有省曰吾人之學飾情抗節矯諸外先生之學  
精深極微得諸心者也反服執弟子禮已文成居  
越時時造越中請質已太息曰是某之罪也夫何  
風之未遠也辭還家駕小車從二僕北行所至以  
師說化導所至人聚觀聽者無慮千百抵京同志  
相顧貽愕共匿車勸止留一月竟諧衆心而及而  
汝止意終遠矣汝止骨剛氣和性靈朗徹見人眉  
睫卽知其所存學者意慮稍疎漏見之不敢正而

視也接引人無間僕隸雖顯貴悍戾不說學者聞  
言皆愧悔謝不及有蓄疑不解者旁及他事使本  
疑頓解機應疾響諸聲應氣求者望庭爲歸與剖  
析精蘊莫不虛往實還而喜溢色眉也益汝止之  
學以悟性爲宗以反己爲要以孝弟爲實以樂學  
爲門以太虛爲宅以古今爲旦暮以明學啓後爲  
重任以九二見龍爲正位以孔氏爲家法其言曰  
只心有所向便是欲有所見便是妄旣無所向又  
無所見便是無極而太極又曰知愚夫愚婦與知  
與能與鳶魚飛躍同一活潑潑地則知性矣語持

功太嚴者曰君子不以養心者害心有問放心難  
於收者呼之應而起曰汝心見在何求心乎曰卽  
事是心更無心矣卽心是事更無事矣郡守召辭  
以疾謂門人曰致師而學學不誠矣往教教不立  
矣不往是不仁也必往是不智也此道之精也或  
問先生何不仕曰吾無往而不與三三子者何敢  
隱也或勸之著述不應洪御史垣構舍居其徒吳  
御史悌抗疏薦不報大學士趙貞吉誌其墓以爲  
契聖歸真生知之亞晚作格物要旨勉仁方諸篇  
或百世不可易云從受學者甚衆而林文選春最

賢春字子仁幼學堅苦已受學悛悛謹循一束修  
之問畏之若苞苴行必愜人情之所安故不爲嵬  
崖斬絕之行言必衡乎力故不爲要眇浮濶之言  
於世紛華盛麗猥巧慧辨未嘗一有濡膩也起家  
爲會試舉首登進士第官吏曹至文選郎中吏部  
稱文選至要重故峻門第雖親故不往拜以爲常  
子仁獨門無留賓同志中雖名位絕不相埒者悛  
悛下之惟謹出部則徧走刺諸賓客夜則挾衾被  
往宿觀寺中講學竟夕以爲常其論學輒曰吾師  
心齋說如是惟恐人之不入意烝烝如也而同志



日臻是時縉紳士以學萃京師者數十人其聰明  
解悟能發揮師說者推山陰王汝中畿志行幅實  
則推子仁與吉水羅達夫洪先達夫於朋友中最  
沈密矣然子仁猶面疵之以其露才也然子仁本  
以長厚清苦謹繩墨自立日以朱墨筆點記其意  
向臧否醇雜自程度而時學徵本體益精頗以爲  
於膠解凍釋未知其何如而子仁亦自歎曰此治  
病於標者也然其後蕩者失所歸而子仁終質行  
矣子仁官吏曹父以母病癰嘗謝病歸養長選事  
慎擇監司守令而賢儒同志者薦進之其自言曰

選曹之職上欲以其心通於君相與冢宰之心下欲以其心通於選人與天下人之心相冢宰之心未必皆選人與天下人之心選人之心未必相冢宰之心誠令相冢宰之心與天下之人心合則吾職舉吾志行矣其自任如此

海寧董蘿石澣年六十有八矣以能詩聞江湖間與其鄉之業詩者十數輩爲詩社旦夕吟詠至廢寢食遺生業時俗共非笑之不顧以爲是天下之至樂也已遊會稽聞王文成講學山中以校肩其瓢笠詩卷訪之入門長揖上坐文成異其氣貌且年

老矣禮敬之又詢知其董蘿石也與之語連日夜蘿石退謂何生秦曰吾見世之儒者支離瑣屑修飾邊幅爲偶人之狀其下者貪饕爭奪於富貴利欲之場而常不屑其所爲以爲世豈真有所謂聖賢之學乎直假道於是以來濟其私耳故遂篤志於詩而放浪於山水今吾聞夫子良知之說而忽若大寐之得醒然後知吾向之所爲日夜弊精勞力者其與世之營營利祿之徒特清濁之分而其間不能以寸也幸哉吾非至於夫子之門則幾於虛此生矣吾將北面夫子而終身焉得無以旣老

而有所不可乎秦起拜賀曰先生之年則老矣先生之志何壯哉入以請於文成文成喟然嘆曰有是哉吾未或見此翁也雖然齒長於我矣師友一也苟吾言之見信奚必北面而後爲禮乎蘿石聞之曰夫子殆以予誠之未積歟辭歸兩月棄其瓢笠持一縑而來謂秦曰此吾老妻之所織也吾之誠積若茲縷矣夫子其許我乎秦入以請陽明子曰有是哉吾未或見此翁也今之後生晚進苟知執筆爲文辭稍記習訓詁則已侈然自大不復知有從師學問之事見有或從師問學之者則闕然

共非笑指斥若惟物翁以能詩訓後進從之遊者  
遍江湖蓋居然先輩矣一旦聞予言而棄去其數  
十年之成業如敝屣遂求北面而屈禮焉非天下  
大勇其孰能與於此則如蘿石固吾之師也而吾  
豈足以師蘿石乎蘿石曰甚哉夫子之拒我也吾  
不能以俟請矣入而強納拜焉陽明子固辭不獲  
則許之以師友之間與之探禹穴登爐峰陟秦望  
尋蘭亭之遺迹徜徉於雲門若耶鑑湖剡曲蘿石  
日有聞益克然有得欣然樂而忘歸也其鄉黨之  
子弟親友與其平日之爲社者或笑而非之或爲

詩而招之返且曰翁老矣何自苦若是邪蘿石笑曰吾方幸逃於苦海方知憫若之自苦也顧以吾爲苦耶吾方揚鬚於渤海而振羽於雲霄之上安能復投網罟而入樊籠乎去矣吾將從吾之所好自號曰從吾道人王文成爲之記

紹興守南元善大吉渭南人始以禮闈舉主於文成稱門生然豪曠性不拘小節於學弗信也見門人日進心疑之遣弟逢吉造焉意以覘逢吉聞言歸脩以告如是者累日乃悟曰所學是也始數來就見且曰大吉臨政過多矣先生何無一言以教之

先生曰何過元善。歷數其事先生曰吾言之矣。元善愕曰未有也。口詈吾不言。君何自知之。曰良知先生。笑曰良知非我所常言者乎。元善笑謝而去。居數日復來自數過。加密且曰與其過事而悔也。孰若先生預以告。不犯爲佳乎。先生曰人言不如自悔之爲真。元善笑謝而去。居數日復來自數過。益密且曰卽身過可免。心過奈何。先生曰昔鏡未開可藏垢也。今開矣。雖纖塵落亦見。能自藏乎。此作聖之幾也。元善乃大省。闢稽山書院聚八邑之士。使就學而政益大修。士夫之不逞者胥怨。誹以

入覲失官去猶致書千數百言勤勤懇懇惟以得聞道爲喜急問學爲事恐卒不得爲聖人爲憂至得喪屈伸間一語不及也文成嘆息以爲有朝聞夕死之志云

約論曰自王文成惻天下以識爲知以踐迹爲行而離述於本也揭良知爲聖訣卽知卽行卽博卽約俾天下知聖可學而至渙然於本心淪淪乎有被矣然默成不言之旨近破去經傳而束書游談者利之得心忘象之宗近脫略成式而宕無忌憚者假焉其悟者億心意知物無善惡語益超頓而



踐履不掩甚乃汗下滋僞士大夫至以學相詬病  
則豈學之過哉高者研寂靜而頗訾忠信篤敬爲  
下乘博獵者爲譎張集同游爲招徠引取而時押  
闔翕闢之乃心心靡靡覲顏色取仁爲人師則夫  
依獨知自慎自慥慥於庸言庸行以乾乾不息  
於誠也豈非道德之符而修學之統哉昔孔子思  
先進難有恒而慨道之不明不行斯已久矣

書卷之四十四終